

■ OR DA LA VITA DA LUDMILLA CAHENZLI

«Survival» a chasa

L'emna passada è mes mat vegnì cun in cedel or da scola.

«Guarda mamma, quai è per tai.»

Per il solit reagesch jau sin trais differents modas, sch'i vegn cedels dal scolast. A: Jau vom en svaniment. B: Jau ma zup sut il cumpost. C: Jau survegn depressiuns e stoss immediat telefonar a mia terapeuta per far giu in termin.

L'emna passada èsi stà auter. Jau hai reagì a moda suverana, mes uffants schessan «coola».

I n'era betg mo in cedel da la scolasta da religiun che vuleva envidar ad ina saira da geniturs. Na, atgnamain eri in cedel – sco usità – cun pulitas pretensiuns pertutgant ils dus dis da «survival en il guaud». Durant quels dus dis duain ils uffants «racoglier experientschas fundamentalas ordaifer la stanza da scola ed emprender abilitads da surviver en cuntradas selvadias».

La raschun principala per ils dis da survival n'era sa chapescha nudada nagliur sin il cedel. Il motiv è quel: quest'emna è Ascensiun. In di avant ed in di suenter quest firà han nossas scolass serrà. Ils scolars han liber ed ils scolasts era. I vegn pia fatg scola mo il glindesdi ed il mardi. Quels dus dis fan ils scolasts projects per ch'els possian chalar il mardi gia da mezdi e lura svelt sezer en l'auto e charrar en l'Italia senza vegnir en colonnas. Scolasts èn clevers.

Ma basta. Per ch'els scolasts n'hajan betg memia stregn avant il viadi strapatschant en l'Italia, datti dis da survival per ils scolars. Ed il cedel instruescha ils geniturs tge ch'igl è tut da preparar.

«Punct 1. Velo controllà e pumpà! Cun chazzola davant e davos che funcziunan omaduas!» Per cletg ha mes um Eugen pinà ils velos avant duas emnas. Chazzolas n'han noss velos betg. Ma ins na sto gea betg adina prender tut uschè serius.

«Punct 2. Buns chalzers da muntogna. Betg novs, mabain gia duvrads, uschiglio datti vaschias!» Tipic scolasts. N'han nagi-



ILLUSTRATURA YVONNE GIENAL/WWW.YVONNE-GIENAL.CH

na idea. Danunder duess jau prender la primavaira chalzers da muntogna che mes mat ha gia duvrà, sche ses pes creschan mintga mais per in numer. Jau decid da dar ad el ils veders da mia figlia. Vaschias datti soviso.

«Punct 3. Nutriment sanadaivel.» I suonda ina glista cun circa trenta criteris ch'ins sto tegnair en tar las mangiativas ch'ins dat als 'survivalists' en il satgados. Jau decid dad ir glindesdi en damaun al tanca-di e da cumprar las chaussas. Pertge sch'jau cumpr gia il venderdi las mangiativas, sva-neschan ellas tuttina sur sondadumengia or da frestgera – nun ch'jau ma tegness propi als criteris da sanadad inditgads sin il cedel.

Sulettamain cura ch'jau legel «punct 4» ponderesch jau in mumentin, sch'jau duess forsa tuttina telefonar a mia terapeuta. «Il mardi cumenza il di da survival in zic pli baud. Nus ans rimmaint a las 4.00 tar la chasa da scola. Igl è impurtant ch'els uffants hajan mangià in bun ensolver, perquai che nus faschain ina lunga tura cun il velo. Ils

uffants turnan a chasa a las 11.00. Suentar han els liber.» (Ed ils scolasts van en l'Italia. Da questa persvasiun na pudess gnanca mia terapeuta ma curar.)

Tut quai munta ch'jau stoss levar da las 3.00. U forsa gia avant. Pertge fin ch'jau hai dumagnà mes mat-dormastagn-e-bain or da letg, dovr jau segir ina mes'ura. E fin ch'jau hai motivà el da mangiar dus tschaduns cornflakes da quellas uras, vai anc ina giada in quart d'ura. Ma tuttenina hai jau in'idea geniala. Jau na telefonesch betg a la terapeuta, mabain a mes um.

«Ti Eugen. Has ti gia in regal per mai per il di da la mamma?»

«Jau aveva en senn da cumprar fluras.»

«Ti pos spargnar ils raps per las fluras. Jau hai ina bler meglra idea.»

«Tgenina?»

«Quest regal per mai pudessas ti gist cumbinar cun ir a lavurar in zichelin pli baud il mardi proxim.»

«Gliez fiss prima. Tge èsi pia?»

«Ti stuessas levar il mardi a las 3.00 e trametter noss mat a ses di da survival. Ti pudessas lura gist anc controllar, sch'els pneus dal velo èn pumpads ed unscher la chadaina. Quai fas ti gea blier meglier ch'jau. E l'avantag fiss che ti fissas ina giada ad uras en biro. Là sas ti gea anc durmir in amen. Quai fiss in prima regal per il di da la mamma.»

Igl è chapibel che la risposta na vegn betg gist uschè spontan.

Pir cura ch'jau empermet ad Eugen che quest regal valia lura anc per ils proxims trais dis da la mamma (fa quatter matgs fluras a 35 francs; en total 140 francs), di Eugen da quai plat: «Sche bun pia.»

Quai è survival a chasa.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria